

古今說部叢書

第七集

三

詩家游仙一體。自唐人以來。多爲絕句。或別有寄託。或近香奩豔情之作。而出以迷離愉悅之辭。要無無謂而作者。此集爲游仙詩三百首。其託意不可知。而語帶烟霞。有雲愁海思之遺。所謂詩雜仙心者也。先生編樊榭山房前後二集。皆不登載。聞舊有堇浦先生一序。亦未之見。此本乃郡人所傳鈔者。亟爲梓而傳之。零珠碎璧。猶可寶貴。況三百首之多耶。同里後學陳鴻壽引。

樊榭山房集外詩

錢塘厲鶚太鴻

游仙百詠 有序

游仙詩。自晉郭景純倡之。逮唐曹堯賓。明馬鶴松。連篇累牘。奇豔可誦。予閒居寡歡。偶爾綴韻。輒成百章。大要游思囈語。雜以感慨。玉茗先生所謂事之所無。安知非情之所有者也。且靈均作騷。尙託于雲中君湘夫人。其亦庶幾不悖作者之意乎。有好事者出而讀之。詞雖不工。聊當龜茲一覺云爾。康熙庚寅六月樊榭山人自題

旭影瞳瞳若木枝。與君雲路遠相思。寄將一幅琅玕紙。要寫三山星子詞。東華南嶽笑相邀。笙鶴時聞下沅寥。月裏忽驚青鳳舞。坐中誰弄九靈簫。入水閒乘赤鯉魚。具區秋淨接空虛。橫吹烟竹包山裂。待與龍威索素書。鶴背霞光縹緲生。乘風御氣滿天行。丈人笑指前頭去。不到青城到赤城。小童汲水煮金芽。藥徑松蹊仙子家。只恐無端賺劉阮。洞門不許種桃花。

石橋跨澗水粼粼。白艸青芝遠世塵。林屋洞中無甲子。一朝天后不知春。
瑤池仙史許飛瓊。阿母傳呼到玉京。龍月城中親採進。黃中朱李字分明。
散仙自有玉樓才。點石爲金數未該。欲買鏡湖山一半。黃妃許借聘錢來。
元圃年年發異葩。折來笑向媚蘭誇。金莖琪樹同千歲。不是人間短命花。
雲霞空裏擁旌旄。多謝金妃賜絳桃。歸到洞天纔日午。青童閒曬赤霜袍。
絕澗高峯斷白雲。清風爲佩織煙裊。玉笙吹落桃花月。萬壑千厓人不聞。
綸巾羽扇綠蕉衫。懶把高風混俗凡。雲笈錦函都讀遍。幾時同到積書巖。
碧溪半繞玉莎斜。處處春雲處處花。笑問羅天香散未。侍兒齊候白鸞車。
紅雲樓閣迴崔嵬。虎豹天關晝洞開。昨進下方求雨疏。紫清敕遣鐵車雷。
靈藥葫蘆慣繫腰。醉歸時有鶴相招。罡風亦識飛仙過。扶住空中五色橋。
絳節朝回下玉階。紫雲盡繞案綏綏。洞天月暗歸何處。十六華陽金字牌。
清虛標格自高寒。弄罷瑤琴倚石闌。螭髓麟脂都俗膩。胡麻爲飯菊爲餐。
溟渤茫茫入望無。半瓢身共水雲孤。月明飛過驚龍睡。爲有瓶中煮海珠。

霓佩霞衣拉伴遊。玉真亦自愛風流。金雞洞口何年遇。笑把桃花當蹇修。
琪花飄落紫瓊杯。邀得羣真踏月來。元碧酒醒天未曉。不知身臥醉仙臺。
驪仙貌古似長松。蒼鹿銜花兩兩從。攜得一枝猿臂笛。隨風吹上幔亭峯。
天風瀕洞玉虛寒。一朵香雲舞彩鸞。光碧堂中金母坐。峨峨不動九星冠。
人間睡覺總濛濛。誰聽天雞叫碧空。試向金臺山頂望。海波初湧日輪紅。
九室雲開香篆飛。珠簾朝卷雨霏微。琉璃窻外低花影。知是烟霄降紫妃。
芙蓉冠子紫烟衣。一笑相逢跨鶴飛。贈我鳳冠仙栗美。海山遊遍不知飢。
翠河迴繞玉清鄉。兩兩仙姬象鳳皇。無底筠籃何所有。琅玕花滿露華香。
月映冰肌冷紫羅。下觀五岳翠嵯峨。挹將斗柄歸瑤島。夜半清寒沆瀣多。
笑看海水浴金稚。穩駕文虬禮玉華。八素元經親講讀。碧琳字映曉天霞。
長縣樓上冠朝霞。靜倚雲窻萼綠華。爲憶雙雙玉條脫。一時留贈在羊家。
河源天半盡雲濤。同御長風興頤豪。八鳳珠旂駐瑤圃。開尊不惜酌龍膏。
玲瓏珠樹曉來青。調笑梁清隔錦屏。祇爲醉中疏禮數。天教罰作酒旗星。

下界求仙不可憑。豈知仙在最高層。冥冥風雨飈輪過。遙指靈壇芳苾燈。
月華碧藕浸冰壺。玉戶瑤階赤日無。自是蕉源清冷甚。何須更寫六壬符。
霞綃雲帔是新裁。曲曲仙源不易來。昨向扶桑今日返。滿身青雪下瑤臺。
清思逸藻入元虛。半畝烟霞手自鋤。何事玉皇猶未見。不收香案較文書。
龍晴仙稻滿天倉。粒粒珠璣夜有光。不比水仙居澤國。秋來只采芡爲糧。
翩翩白帝駕雲軿。不見皇娥十萬年。聞道別來滄海淺。雙眉依舊翦秋烟。
紫琅殿裏讀黃庭。不覺虛天夜色冥。素紙拈來輕似雪。翦爲明月照雲屏。
萬尺藤蘿蔽月明。玉京洞口濕雲生。山深并絕青猿叫。但聽波濤石裏鳴。
司中上將守天關。玉珮霓衣押兩班。素女傳宣呼上殿。自稱臣住小蓬山。
松濤瀨瀨響方壇。桐柏山中六月寒。巖下一泓清澈骨。夜深來浴碧霞丹。
穿雲忽見聳嵒峩。同駕青蜺看沃焦。滄海桑田非妄語。波濤萬古此中消。
崑崙瑤圃樂婆娑。悔返驂騑事若何。我欲閒乘希有鳥。來聽黃竹白雲歌。
碧空千里映瑤林。夜靜秋高爽籟深。天柱峯頭好明月。不知人世雨淫淫。

蜿蜒神物抱珠游。欲摘明珠綴玉旒。不用相求燒燕炙。五雷頃刻卷靈湫。
銀漢迢迢望轉賒。當年空說客乘槎。天孫夜靜調機杼。織出蓬萊五色霞。
驅光逐景白霓衣。遊戲三山弱水飛。蓮葉舟輕波渺渺。月中載得露華歸。
仙府層城隔彩霞。璇宮銀榜右英家。麻姑昨遣青衣至。邀看唐昌玉藥花。
黃籙爲冠白袷衫。雲臺峯下石巉巖。道人不惜還丹訣。示我囊中紫玉函。
奇松危石轉山坳。洞府何人踏水敲。怪底夜深龍劍嘯。昨從鐵柱斬青蛟。
廣寒清冷桂花香。搗藥丁東怨夜長。一曲霓裳元絕調。人間傳下誤明皇。
羽蓋霞旂曉日分。隨班共謁玉宸君。衆中獨賜青鏤管。浴月擎雲寫祕文。
蒼蘚如雲石作梯。啾啾終日白猿啼。山君夜守長生藥。太乙爐中六一泥。
雙瞳炯炯映黃眉。嚙紙爲驢每倒騎。得啖青雲芝一朵。千年顏色似嬰兒。
阿母前頭郭密香。雲衣常佩虎螭囊。今朝侍從朝金闕。帶笑傳呼白鳳皇。
廣陵八月怒濤迴。駕鯉驂螭踏浪來。不許波臣迎水面。笑將羽扇劃江開。
蓮花巾子不沾塵。碧落飛行自在身。袖拂白榆歸去晚。一聲長嘯裂青旻。

朱霞片片映瑤臺。月下蟠桃帶露開。彷彿有人嬌似玉。笛聲吹徹紫雲迴。
扶桑樾熟四千迴。金骨飛翔遍九垓。路遇安期前致語。明朝相訪向蓬萊。
玉女峯前是我家。荷鋤日採滿溪花。仙情不比凡情渴。況有千年冰谷瓜。
恨無錦字寄蘭翹。戲躡青鸞上玉霄。爲艸填橋烏鵲檝。贈予十幅紫蛟綃。
晴空千仞立青岑。瀑布飛流下澗深。獨坐蒼松無與伴。泠泠一撫落霞琴。
天台分手會何期。海色西風無限悲。欲倩滄洲轉言鳥。好從別後道相思。
神仙亦自有英雄。身跨青驪疾似風。思射天狼清斗極。扶桑枝上取彎弓。
霧縠衣輕盡六銖。花虬七色五雲扶。琅函手裏瑤光散。一卷三天豁落圖。
蓮花寶劍影廉纖。雙袖飄飄拂紫髯。遙望元洲欲飛渡。醉眠水底弄銀蟾。
君山一點似青螺。夜約盧耽控鶴過。喚取湘靈來鼓瑟。月明瓊瑤出江波。
瓊肌蓮臉髮鬢雲。素手常攜采藥籃。踏破白雲歸碧落。被風吹下鳳皇簪。
千年曾醉岳陽樓。城郭人民感昔遊。烟景欸然看漸滅。一聲鶴唳洞庭秋。
與子逍遙億萬齡。笑伊舉酒勸長星。共談混沌前頭事。雙手摩挲天柱銘。

星窗月戶洞空虛。琅簡輝煌映蕊書。俯視茫茫烟九點。神仙自是好樓居。
月出蓬壺皎若銀。疏星遙隔絳河濱。凌波小襪飛行急。不染人間半點塵。
弱水迴環三島流。望中依約見瓊樓。浮來玉井蓮花瓣。聊當仙人不繫舟。
鴻龍玉狗啓天關。東海團團吐曉暎。一尺紫雲遮帝面。近臣始識玉皇尊。
路入龜山翠不分。藥香烟暖氣氤氲。洗花往往逢溪女。五疊春衣剪彩雲。
涓涓花底瀉紅泉。千个琅玕拂翠烟。愛看月明鸞鳳集。鏗鏘音韻羽衣妍。
碧桃紅杏四時春。嵐彩霏霏踏玉塵。親扣丹扉知客姓。手提如意跨青驢。
銀河爛熳彩雲鋪。桂蓋亭亭映玉壺。寶路衣香吹滿地。汾祠昨夜祀黃姑。
白鸞塵尾散香來。王母筵中笑舉杯。入夜須然蜃脂燭。燭龍空裏吐樓臺。
玉雞初唱日東升。萬仞蒼厓挂古藤。欲識九還丹熟處。金精黃嬪各飛騰。
海上琳宮次第開。琉璃牆外淨無苔。金城莫攬攜兒睡。盡是鸞龍變化來。
蒼茫烟水問迷津。芳艸無風氣自春。別業桃花源一曲。年來貧與避秦人。
凝虛殿裏晚風涼。紅桂花間映紫房。特召書仙開寶籙。御爐芬馥玉蕤香。

樓閣空中白玉京。飛龍驂駕兩相迎。紫皇敕掌仙宮籍。金管親題北斗名。
花裏瑤軒夜不扃。麟毫簾卷水晶屏。娉婷不爲春愁坐。仙語泠泠細誦經。
玉女投壺帝座旁。赤鸞青鳥列成行。脫臯親見天公笑。不信人間是電光。
瓊童雙引五雲車。天路繽紛散寶花。夜靜廣寒宮未閉。吳剛爲我捉金蟾。
散髮青童控鹿隨。昔年曾是牧羊兒。蹋翻西海波濤動。十萬魚龍不敢窺。
雲冠鶴氅兩瞳青。劍色煌煌錯七星。隻影空山孤月夜。畢方网兩盡潛形。
崑崙頂上御天風。數粒蒼山眼界空。遙指長安如蟻窟。五陵萬古碧濛濛。
星漢微橫玉漏遲。斑麟輦降辟邪隨。招仙閣外涼如水。只有琉璃扇子知。
翠杓瓊漿細盡歡。銀宮高處不勝寒。太霞一曲歌纔遍。抱得雲和自在彈。
開遍三花樹樹秋。綠雲萬頃白蓮浮。九靈少女吹簫過。玩月同登十二樓。
紫霄無路可先登。難大何年亦上昇。欲識蒼蒼非正色。乘風穩跨北溟鵬。
抱一含元道自成。機通微妙異凡情。世人莫詫神仙幻。戲喝蓮花陸地生。
洞天。碧樹紅芝映玉潭。園客新分香艸種。靈妃無事養華霞。

衣翦龍紗捫赤縑。名登紫府冠仙曹。王公遣在方壺住。東海何人敢釣鰲。
靈人浴日向丹池。曉看陽鳥出水飛。掠過神洲還入海。江山不改是耶非。
一幅龍綃染曉霞。往來弱水不乘槎。新傳弄玉吹簫譜。寫與緱山姊妹家。
步虛仙唱隔花聞。座上風吹五朶雲。寄語蘭香珍重處。瑤編常把辟邪熏。

續游仙百詠

斜界銀河低玉繩。步虛風冷露如冰。月中無數閒田地。更築瓊樓十二層。
貝闕龍堂會衆仙。赤蛟戲水鼓湘絃。一聲裂帛秋波動。驚起江妃不得眠。
青鬟爭捧綠瓊車。紫府眞妃號九華。忽若鸞笙雲際響。雙成笑隔碧桃花。
玉卮娘子着雲衫。月面星眉貌不凡。阿母膝前梳髻罷。綺窗教展藥珠函。
負輓牽牛曉飲河。遙逢帝子道如何。仙家夫婦皆耕織。好借天田種玉禾。
天上生辰祝紫皇。羣仙齊進九霞觴。太元玉女催呈舞。一曲霓裳日月長。
銀臺金闕盡前緣。玉籍書名豈偶然。竊藥偷桃應犯戒。玉皇破例恕神仙。
三島微茫鶴到遲。峯頭閒倚玉桃枝。要將碧海長鯨掣。繫取虹蜺作釣絲。

風佩泠泠過洞陰。飛仙游戲本無心。小餅貯得瀟湘雨。滴下世間三丈深。
東溟巨浪蹴遙天。浩劫揚塵幾萬年。親聽海邊橋石語。何曾流血被秦鞭。
獨駕螺舟戲水濱。波平風靜月如銀。阿誰江上吹橫笛。水府老龍來化人。
金根經尾玉名僉。赤足身騎八字蟾。曉入通明齊候扇。半空星斗捲珠簾。
羽蓋颿車天際來。武夷山上起樓臺。鳳兒拍板彭韶唱。一曲人間最可哀。
三天最恥作頑仙。秘檢珠囊盡日研。帝有新宮落成詔。書銘拜上彩霞箋。
集真島上手譚池。鶴髮朱顏坐對碁。不遣世人看半局。恐防誤卻采樵時。
挂星槎穩海爲鄉。珠炤常爭日月光。東到扶桑觀日出。扶桑更比向時長。
海上樓船去已遙。祖龍那得上青霄。下方一點如螢火。道是阿房三月燒。
袖拂羅浮瀑布斜。軒轅相約看桃花。洞中彩蝶車輪大。騎向天邊化作霞。
仙官返奏罷名山。鳳輦天衢一瞬間。武士踏雲紅抹額。眞姬曳霧綠垂鬟。
深洞烟霞是太初。石牀晝捲水簾疎。眞文一卷虬龍篆。不是人間世俗書。
華山朶朶翠芙蓉。毛女乘風戲碧松。夜靜寒空秋月白。清歌一曲上蓮峯。

天上春光世上稀。休將紅袖換霞衣。遙憐羅郁思凡謫。一墮塵寰尙未歸。
珠佩星冠障扇輪。雲英年小締仙姻。姮娥甘向廣寒老。冷抱蟾蜍不嫁人。
嬋娟玉女駕雲軒。星漢垂空盡可捫。五色雲中仙掌現。巨靈擎出洗頭盆。
海上彈琴一葉船。赤龍倏忽化紅絃。泠泠弄罷水仙調。攪霧擎雲飛上天。
偶向扶桑碧海過。冰蠶近日始生蛾。上元寄語天孫道。織室暫停拋玉梭。
蜃樓縹緲在虛空。貝闕玲瓏落照紅。莫怪盧生尋不見。盡驅三島入壺中。
下繩懸厓上摘星。往來羽服響流鈴。白猿跪獻芙蓉劍。清嘯一聲歸翠屏。
十二闌干十二樓。閒時登望紫烟浮。媧皇補石猶難到。一道銀河入海流。
閩風苑裏一春閒。青鳥銜書報阿環。綠髮細梳三角髻。嵯峨學得海中山。
青松如蓋石如雲。猛虎蹲龍洞口分。童子帶花兼汲水。雙雙盡待大茅君。
冰輪碾破滅清光。修月工人斧鑿忙。玉屑紛紛雲際落。西風吹下盡成霜。
面面軒窗敝水晶。瓊筵烹鳳膾飛鯨。洪厓莫漫憂沈醉。還有冰桃與解醒。
彩女遙聽金闕鐘。曉粧初起紫微宮。不須人世長蛾樣。新月纖纖落鏡中。

聚窟洲邊月正高。夜彈雙禮入琅璫。龍王小女親求曲。風曳紅衫上海濤。
神霄爲吏不知年。偶謁金鑾獻殿前。已是世人貪莫厭。休將竹葉變青錢。
駐景何須繫日繩。空歌碧落任飛騰。劉郎辛苦無仙骨。枉費當年鳳牕燈。
塵網紛紛似繭纏。誰知世外有神仙。先生學得癡龍蟄。一覺松風太華眠。
劉綱夫婦住瓊臺。鶴帔霞裙次第裁。看咒庭前桃樹鬪。一株逃向白雲堆。
吹徹參差白鶴鳴。星輿歷歷碾雲行。廣寒仙兔春靈藥。丹桂香中玉杵聲。
錦字空中鳳口銜。靈風吹冷五銖衫。相招直渡天河去。片月爲舟雲作帆。
南嶽夫人道貌姝。新收弟子字花姑。碧桃紅杏天邊有。曾見瓊花一種無。
萬里清風萬里霞。一重樓閣一仙家。不知何處飛來鳳。啄落梧桐滿樹花。
皎潔秋空碧瀟澄。玉闌曲曲盡堪憑。雲中何處聞雞犬。昨夜旌陽拔宅升。
雪藕交梨閬苑栽。蘭香生日智瓊來。麻姑遣送行厨酒。張碩何曾飲一杯。
倒景樓臺曉氣分。珠簾掩映紫微君。侍兒閒取天衣曝。下界爭看五色雲。
星斗宮中月鏡開。粧遲不待玉郎催。今宵織女成花燭。簇擁仙娥去看來。

殿角風生金鐸捲。霞光萬縷射虹窗。王喬無事吹鵝管。驚起花間鶴一雙。
弄電行雲無定蹤。海天空闊有誰逢。茫茫萬里蓬山雪。無數仙人跨白龍。
方丈山邊十畝餘。羣仙相釣共揮鋤。秋來種得靈芝熟。卻喜天倉不索租。
毛節朱幡事倥傯。冷松餌桂已忘年。天邊日月何曾落。只繞崑崙左右旋。
閭闔門前五嶽朝。海神輸貢有蛟綰。奏餘七日鈞天樂。實盡纏頭十萬條。
雲階月地發天香。燭夜花前共舉觴。使酒忽翻青玉案。列仙拍手笑清狂。
進饌擎杯滿碧空。玉清高宴紫蘭宮。歌塵灑遍瑤姬雨。舞袖招過少女風。
曼倩歸來十八年。黃冠白袷故依然。追隨翠水瑤池會。還是詼諧謔衆仙。
綠樹都栖五色鸞。藏春仙鳴不知寒。棗花桃核尋常物。只食金膏九轉丹。
橘中對奕客欣然。笑別巴園直上天。贏得一雙龍縞襪。蹑雲踏月不曾穿。
嶽蓬仙子字幽蕭。一霎秋空冷佩飄。報道龜山金女到。拜時墮卻翠鸞翹。
一種三清旌節花。福根還自地仙家。玉書敕賜青童捧。爭擁韓終白鹿車。
琉璃宮殿水精簾。桂影榆花夜色添。寒氣逼人偏獨坐。玉肌那怯雪羅幃。

紫雲娘子擅才思。吸露冷風姑射姿。霧閣雲窗人不見。衍波箋寫步虛詞。
閃斷芙蓉翠羽旂。雲中鶴駕不停飛。孔昇後乘誰同載。豹尾竿前是玉妃。
嵩高夜靜月明孤。石冷泉香九節蒲。聞道叔卿騎鹿到。王興峯頂笑相呼。
水仙去謁洞庭君。珠箔瑤窗寶瑟聞。最笑座中容柳毅。纔攜龍女便行雲。
芙蓉城裏五雲樓。夜共瓊英跨鳳遊。爲報石家多置酒。玉宸新拜醉鄉侯。
萼綠安香坐玉階。藕絲裙覆蹋雲鞵。衆中鬪得金光艸。輸卻雲鬢玉燕釵。
生洲飛步拾紅蘭。金醴餘醺尙帶酸。袖裏盛將滄海月。夜深驚起玉龍看。
新授華陽司命君。青旄紫蓋氣氤氲。碧瑤箱鎖飛仙印。一軸三霄九錫文。
碧雲城外砌玻璃。登望蓬壺小欲迷。誰喚老蟾歸海底。桃都山上一聲雞。
居巢笙響晚風和。忽聽雲中度玉珂。卻是伶倫纔謁帝。相將嶰竹倚清歌。
青霞爲佩月爲鈿。獨坐花陰謝自然。一卷黃庭纔誦罷。玉爐猶有未銷烟。
園谷東來路渺茫。流沙西去似天長。而今講道中黃闕。猶湧成都玉局牀。
邀得青牛駕鈿車。椒庭列坐酌流霞。仙人舞罷山香曲。落盡滿庭琪樹花。

羸娥舊是鳳樓人。飛雪丹成不肯勻。笑語蕭郎天上樂。玉簫占得幾千春。
雲表真人絳節回。谷中仙子綠窗開。梅姑繡履乘潮去。江女珠璫弄月來。
窈窕青童鬢掠雅。翠簾不掩煮仙芽。夜深天母裁宮錦。半是紅雲半是霞。
蟠桃一熟歲三千。纔是雲華攏髻年。底事驚心封不夜。花間故惱鳳皇眠。
落盡殘星海色明。天風浩蕩卷霓旌。朝元跨鶴歸來曉。霜冷石樓鐘自鳴。
冰簟瑤牀夢乍醒。玉童持簡進雲屏。上方割取乖龍耳。種得鍾山李似瓶。
羣玉山頭策府開。羽陵粉蠹化香灰。瑤篇寶軸三千卷。穆滿何曾解讀來。
九館仙人拜大夫。射鳥研兔盡癡愚。長生錄上添名字。只得龍髯第一珠。
島上瑤宮罨碧烟。繞山弱水浪翻天。羣仙盡駕鸞輪渡。獨掉蓮花破鐵船。
青瞳綠髮老浮邱。常想飄飄伊洛遊。今夜緱山明月好。鳳笙吹過碧雲頭。
仙膳琳厨翠釜香。眞官惟奉紫清皇。已攜北斗斟天酒。更弄南箕簸玉梁。
百丈長虹繞繡楹。半天風雨散班聲。紫宸闕下晨趨出。東望咸池拜日兄。
仙娥結束學嬌嬈。裊雪縈烟一尺腰。東海冰綃雲漢錦。九光燈裏舞衣飄。